

Na osnovu člana 105. stav (2) Zakona o električnoj energiji Federacije Bosne i Hercegovine („Službene novine Federacije BiH“, broj 60/23), Regulatorna komisija za energiju u Federaciji Bosne i Hercegovine je na redovnoj sjednici održanoj u Mostaru godine donijela

*Nacrt*

## **P R A V I L N I K** **O PROMJENI SNABDJEVAČA**

### **DIO PRVI – OPŠTE ODREDBE**

#### **Član 1.**

(Predmet pravilnika)

Ovim pravilnikom Regulatorna komisija za energiju u Federaciji Bosne i Hercegovine (u daljem tekstu: FERK) propisuje:

- a) uslove za promjenu i postupak promjene snabdjevača,
- b) obaveze snabdjevača čiji ugovor o snabdijevanju prestaje,
- c) obaveze novog snabdjevača,
- d) obaveze operatora sistema u postupku promjene snabdjevača,
- e) rokove za postupanje učesnika u postupku promjene snabdjevača.

#### **Član 2.**

(Cilj)

Cilj donošenja ovog pravilnika je stvaranje pretpostavki za efikasno funkcionisanje tržišta električne energije, zaštita krajnjih kupaca, te osiguranje ravnopravnih uslova za sve učesnike na tržištu električne energije.

#### **Član 3.**

(Definicije)

Definicije koje se koriste u ovom pravilniku, uključujući i one iz Zakona o električnoj energiji Federacije Bosne i Hercegovine (u daljem tekstu: Zakon) i drugih pravila i propisa FERK-a, imaju sljedeće značenje:

- a) „**Javno snabdijevanje**“ znači javnu uslugu snabdijevanja električnom energijom krajnjih kupaca iz kategorije domaćinstva, malih kupaca i krajnjih kupaca od posebnog društvenog značaja, pod uslovima propisanim Zakonom,
- b) „**Javni snabdjevač**“ označava elektroenergetski subjekat koji snabdijeva električnom energijom male kupce, kupce iz kategorije domaćinstva i krajnje kupce od posebnog društvenog značaja, koji nisu odabrali snabdjevača na tržištu.

- c) „**Novi snabdjevač**“ znači snabdjevača sa kojim kupac želi zaključiti ugovor o snabdijevanju električnom energijom na početku postupka za promjenu snabdjevača.
- d) „**Operator sistema**“ označava operatora distributivnog sistema ili operatora prenosnog sistema.
- e) „**Snabdjevač**“ znači pravno lice koje obavlja djelatnost snabdijevanja krajnjih kupaca električnom energijom.
- f) „**Postojeći snabdjevač**“ znači snabdjevača koji snabdijeva krajnjeg kupca na početku postupka za promjenu snabdjevača.
- g) „**Rezervni snabdjevač**“ znači snabdjevača koji ima obavezu krajnjeg kupca snabdijevati električnom energijom u slučaju kada ga odabrani snabdjevač prestane snabdijevati.
- h) „**Rezervno snabdijevanje**“ znači javnu uslugu snabdijevanja električnom energijom krajnjih kupaca koji su pod određenim uslovima ostali bez snabdjevača pod uslovima propisanim Zakonom.

## **DIO DRUGI – POSTUPAK, PROMJENE SNABDJEVAČA, USLOVI, OBAVEZE I ROKOVI**

### **Član 4.**

(Opšta pravila i uslovi u postupku promjene snabdjevača)

- (1) Postupak promjene snabdjevača ne može trajati dulje od 21 dan od dana prijema kompletnog zahtjeva kod novog snabdjevača.
- (2) Postupak promjene snabdjevača može se voditi istovremeno za dva ili više obračunskih mjernih mjesta krajnjeg kupca, pri čemu je u zahtjevu potrebno navesti svako pojedinačno obračunsko mjerno mjesto za koje se traži promjena snabdjevača.
- (3) Postupak promjene snabdjevača za jedno obračunsko mjerno mjesto u isto vrijeme se može voditi samo sa jednim snabdjevačem.
- (4) Promjena snabdjevača je besplatna za krajnjeg kupca.
- (5) Krajnji kupci imaju pravo dobiti konačan obračun nakon svake promjene snabdjevača u roku koji ne može biti dulji od 15 dana od dana promjene snabdjevača.

### **Član 5.**

(Postupak promjene snabdjevača na zahtjev krajnjeg kupca, obaveze i rokovi)

- (1) Krajnji kupac koji namjerava promijeniti snabdjevača, obavezan je novom snabdjevaču od koga se želi snabdijevati podnijeti zahtjev za promjenu snabdjevača u pisanoj formi na obrascu propisanom od strane snabdjevača.
- (2) Propisani obrazac pored ostalog, sadrži i sljedeće podatke:
  - a) naziv poslovnog subjekta, sjedište i identifikacioni broj za indirektnu porezu (PDV broj),
  - b) ime i prezime i prebivalište za fizička lica,
  - c) šifru mjernog mjesta i adresa krajnjeg kupca kako je to navedeno u bazi mjernih podataka,
  - d) odobrenu snagu na mjernom mjestu krajnjeg kupca,
  - e) datum podnošenja zahtjeva,
  - f) naziv postojećeg snabdjevača i rok važenja ugovora koji je krajnji kupac zaključio

sa njim.

- (3) Uz propisani obrazac iz stava (2) ovog člana krajnji kupac dostavlja i izjavu, kojom ovlašćuje novog snabdjevača da preduzima potrebne radnje u cilju promjene snabdjevača.
- (4) Ako tokom trajanja postupka promjene snabdjevača do dana promjene snabdjevača nadležni operator sistema primi više zahtjeva različitih snabdjevača za isto mjerno mjesto odnosno mjesta primopredaje istog krajnjeg kupca, postupak promjene snabdjevača pokrenut po kasnijem zahtjevu za promjenu snabdjevača se obustavlja. O obustavi postupka promjene snabdjevača nadležni operator sistema dužan je bez odgađanja obavijestiti krajnjeg kupca i novog snabdjevača po čijem zahtjevu je postupak obustavljen.
- (5) Odredbe stava (4) ovog člana ne odnose se na krajnje kupce za koje je nadležni operator sistema utvrdio da se mogu snabdijevati od više snabdjevača.
- (6) Nakon što novi snabdjevač primi obrazac za promjenu snabdjevača isti analizira njegovu potpunost te:
  - a) ukoliko ocijeni da je zahtjev nerazumljiv ili nepotpun u roku od četiri dana od dana prijema zahtjeva poziva krajnjeg kupca, da u roku od naredna četiri dana nedostatke otkloni,
  - b) ukoliko krajnji kupac ne postupi po pozivu u roku od četiri dana, obavještava krajnjeg kupca kako nema uslova za promjenu snabdjevača.
- (7) Postupak promjene snabdjevača započinje danom primitka kompletnog zahtjeva kod novog snabdjevača.
- (8) Ukoliko je zahtjev za promjenom snabdjevača potpun, novi snabdjevač koga je izabrao krajnji kupac je obavezan nadležnom operatoru sistema podnijeti zahtjev za promjenu snabdjevača na propisanom obrascu u roku od četiri dana od dana primanja potpunog zahtjeva za promjenu snabdjevača, te istovremeno obavijestiti postojećeg snabdjevača o pokretanju postupka promjene snabdjevača.
- (9) Nadležni operator sistema je obavezan da u roku od četiri dana od prijema zahtjeva za promjenu snabdjevača provjeri usklađenost ugovora o priključenju, ugovora o korištenju mreže i pripadnosti balansnoj grupi, te obavijesti novog snabdjevača o potrebnim izmjenama u zahtjevu, ukoliko postoji neusklađenost sa ugovorom o priključenju i ugovorom o korištenju mreže, te u slučaju da ne postoje neusklađenosti, izdati potvrdu o usklađenosti.
- (10) Novi snabdjevač nakon što primi obavještenje od nadležnog operatora sistema o nedostacima zahtjeva u roku od četiri dana obavezan je otkloniti iste, te dostaviti nadležnom operatoru sistema korigovane podatke.
- (11) Nakon što je novi snabdjevač otklonio nedostatke u zahtjevu za promjenu snabdjevača, nadležni operator sistema je obavezan u roku od četiri dana od dana primanja korigovanog zahtjeva izdati potvrdu o usklađenosti.
- (12) Nadležni operator sistema obavezan je nakon utvrđivanja da je dokumentacija vezana za promjenu snabdjevača potpuna, u roku od pet dana od dana izdavanja potvrde o usklađenosti očitati brojila na obračunskom mjernom mjestu i očitane podatke dostaviti postojećem snabdjevaču, novom snabdjevaču i krajnjem kupcu.
- (13) Postojeći snabdjevač je obavezan u roku od četiri dana od dana prijema obavještenja iz stava (8) ovog člana sve podatke potrebne za okončanje postupka promjene snabdjevača, staviti na raspolaganje nadležnom operatoru sistema, novom snabdjevaču i krajnjem kupcu.
- (14) Novi snabdjevač je obavezan osigurati usklađenost novog ugovora o snabdijevanju električnom energijom krajnjeg kupca s ugovorima iz stavka (9) ovog članka.
- (15) Novi snabdjevač s kojim je krajnji kupac zaključio novi ugovor o snabdijevanju odmah

po zaključenju ugovora dostavlja podatke o zaključenom ugovoru (ugovorene količine i dinamika isporuke) nadležnom operatoru sistema, sukladno odredbama Općih uslova za isporuku i opskrbu krajnjih kupaca električnom energijom, pravila o radu operatora sistema i Tržišnih pravila.

- (16) Nadnevak promjene snabdjevača i dan početka primjene novog ugovora o snabdijevanju mora biti dan očitavanja mjernog uređaja, odnosno očitano stanje brojila istovremeno predstavlja krajnje stanje prema postojećem snabdjevaču i početno stanje prema novom ugovoru o snabdijevanju električnom energijom.
- (17) S danom promjene snabdjevača počinje se primjenjivati ugovor o snabdijevanju električnom energijom koji je kupac zaključio s novim snabdjevačem, a prestaje ugovor o snabdijevanju električnom energijom s postojećim snabdjevačem.

## **Član 6.**

(Osporavanje promjene snabdjevača, obaveze i rokovi)

- (1) Postojeći snabdjevač čiji ugovor o snabdijevanju električnom energijom prestaje važiti može osporiti prestanak važenja ugovora sukladno odredbama tog ugovora.
- (2) Postojeći snabdjevač čiji ugovor o snabdijevanju električnom energijom prestaje važiti ne može postavljati posebne dodatne uslove koji nisu obuhvaćeni ugovorom uključujući neplaćene obaveze i obavezan je nastaviti opskrbu krajnjeg kupca sve do okončanja postupka promjene snabdjevača, o čemu će ga obavijestiti nadležni operator sistema.
- (3) Postojeći snabdjevač, koji namjerava osporiti prestanak važenja ugovora, obavezan je u roku od četiri dana od dana prijema obavijesti od novoga snabdjevača iz člana 5. stav (8) ovog pravilnika podnijeti prigovor istom i nadležnom operatoru sistema.
- (4) Odredba iz stava (2) ovog člana ne primjenjuje se u slučaju kada je postojeći snabdjevač prije prijema obavještenja o promjeni snabdjevača, podnio zahtjev nadležnom operatoru sistema da krajnjem kupcu obustavi isporuku električne energije zbog neplaćanja isporučene električne energije ili ako je krajnji kupac koji je uputio zahtjev za promjenu snabdjevača već isključen zbog neplaćanja isporučene električne energije.
- (5) Ukoliko je postojeći snabdjevač podnio zahtjev za obustavu isporuke električne energije prije zahtjeva o promjeni snabdjevača, nadležni operator sistema ne može odobriti zahtjev za promjenu snabdjevača i u tom slučaju nadležni operator sistema obavještava novog snabdjevača i krajnjeg kupca da nisu stvoreni uslovi za promjenu snabdjevača.
- (6) Ukoliko postojeći snabdjevač u roku navedenom u stavu (3) ovog člana ne uloži prigovor na promjenu snabdjevača, nadležni operator sistema je dužan nastaviti postupak i u roku od pet dana od dana izdavanja potvrde o usklađenosti u postupku promjene snabdjevača, osigurati mjerne podatke za obračunsko mjerno mjesto krajnjeg kupca.
- (7) Ukoliko postojeći snabdjevač u roku navedenom u stavu (3) ovog člana uloži prigovor na promjenu snabdjevača, nadležni operator sistema je dužan obustaviti postupak promjene snabdjevača do razrješenja podnesenog prigovora.

## DIO TREĆI – POSTUPAK PRELASKA KOD REZERVNOG SNABDJEVAČA, OBAVEZE I ROKOVI

### Član 7.

(Obaveza postojećeg snabdjevača)

Postojeći snabdjevač ima obavezu bez odgađanja obavijestiti krajnje kupce, nadležnog operatora sistema, rezervnog snabdjevača i FERK o nastanku okolnosti, zbog kojih neće biti u mogućnosti snabdijevati krajnje kupce, a uslijed kojih krajnji kupci imaju pravo na rezervno snabdijevanje u skladu sa Zakonom.

### Član 8.

(Rezervni snabdjevač u slučaju bankrota, stečajnog postupka ili likvidacije)

- (1) U slučaju bankrota, stečajnog postupka ili likvidacije postojećeg snabdjevača, nadležni operator sistema je obavezan očitati mjerne podatke na dan stupanja bankrota, stečaja ili likvidacije i dostaviti ih krajnjem kupcu, postojećem i rezervnom snabdjevaču.
- (2) Dan očitavanja mjernih podataka smatra se i danom promjene snabdjevača.

### Član 9.

(Rezervni snabdjevač u slučaju prestanka ili oduzimanja dozvole postojećem snabdjevaču)

- (1) U slučaju prestanka valjanosti dozvole ili oduzimanja dozvole postojećem snabdjevaču FERK o tome obavještava nadležnog operatora sistema i rezervnog snabdjevača, a nadležni operator sistema bez odgađanja o tome obavještava krajnje kupce.
- (2) FERK obavještenje iz stava (1) ovog člana u slučaju prestanka važenja dozvole, upućuje 15 dana prije prestanka valjanosti dozvole, a u slučaju oduzimanja dozvole najkasnije pet dana prije održavanja sjednice na kojoj će se razmatrati oduzimanje dozvole snabdjevaču.
- (3) Dan prestanka važenja dozvole, odnosno dan donošenja rješenja FERK-a o oduzimanju dozvole smatra se danom promjene snabdjevača.
- (4) Nadležni operator sistema je na dan iz stava (3) ovog člana, obavezan očitati mjerne podatke i dostaviti ih krajnjem kupcu, postojećem i rezervnom snabdjevaču.

### Član 10.

(Rezervni snabdjevač u slučaju nezaključenja ugovora između krajnjeg kupca i snabdjevača ili jednostranog raskida ugovora od snabdjevača)

- (1) U slučaju da krajnji kupac nije zaključio ugovor sa snabdjevačem ili je snabdjevač jednostrano raskinuo ugovor o snabdijevanju krajnjem kupcu, a ne radi se prestanku prethodnog ugovora kao posljedici neizvršavanja obaveze plaćanja od krajnjeg kupca, rezervni snabdjevač zaključuje sa krajnjim kupcem ugovor o snabdijevanju električnom energijom, koji se primjenjuje od dana promjene snabdjevača.
- (2) O zaključenju ugovora iz stava (1) ovog člana, rezervni snabdjevač obavještava bez odgađanja nadležnog operatora sistema.
- (3) Naredni dan od dana prestanka postojećeg ugovora o snabdijevanju električnom energijom, smatra se danom promjene snabdjevača.

- (4) Danom promjene snabdjevača nadležni operator sistema je obavezan očitati mjerne podatke i dostaviti ih krajnjem kupcu, postojećem snabdjevaču i rezervnom snabdjevaču.

## **DIO ČETVRTI – PRELAZNE I ZAVRŠNE ODREDBE**

### **Član 11.**

(Prestanak valjanosti odredbi Pravilnika o snabdijevanju kvalifikovanih kupaca električnom energijom i postupku promjene snabdjevača – Pročišćeni tekst)

Stupanjem na snagu ovog pravilnika prestaje valjanost odredbi člana od 15. do 19. Pravilnika o snabdijevanju kvalifikovanih kupaca električnom energijom i postupku promjene snabdjevača – Pročišćeni tekst („Službene novine Federacije BiH“, broj 30/23).

### **Član 12.**

(Stupanje na snagu i primjena)

Ovaj pravilnik stupa na snagu osmog dana od dana objave u „Službenim novinama Federacije BiH“.

**v.d. PREDSJEDAVALJUĆEG FERK-a**  
**Jasmin Bešo**

**Broj:**  
**Mostar, \_\_\_ godine**